

## Maktubu dənê Jak duwa

*Labiya dənê* Jak duwa

<sup>1</sup> Əndi gə Jak gaba ala giyê gənê Mārî duwa me gənê Aba ciri gə Jesu Kris duwa me nê alang 'yeni nare nê nê Mārî duwa nê cəgədə bam managə səna gəndədə lê ka pad labiya.

Yê gə sii managə wamani-yê

<sup>2</sup> Chamran, managə mani jiga jiga gərsəng da, kalna sədəng 'ywalnangê diyê na. <sup>3</sup> Anê 'ocn com, dusi dan də kala di dwana dera dwayna mani nê gərsəng də bam da, ha harang gə yê gə sii waya. <sup>4</sup> Dəm da, kalna yê dan gə sii waya di hana ladna bəra 'yaŋa-lê ba, dara kal anê kədənê nare nê ladə gə dərəgə bəriŋ nê acna hiŋe kaw ilê sədəngê bəddê me mani mən kaw jalnang bəddê me ca. <sup>5</sup> Gun mən dwarengê dəriŋ naa duwa ina lê na bəddê da, kaləw a urnê Mārî, anji ha 'yawê. Dara Mārî di anji 'yagə nare pad mani gə dusi də dwani dəban alaw gə gun gwale. <sup>6</sup> Gun gə ta di a urnê gə dusi də kala dəban gaga hiŋe dusəwê bəddê, dara aba gaga dusəwê da, wun ya nimi nê kuray-yê nê gale ugə cogə ha nəm kame kame ta de. <sup>7</sup> Gun gə ya ta de da, a 'wacnana dara ba ha 'ywa mani hiŋe managə Aba ciri əsəwê bəddê. <sup>8</sup> Dara anji i gun gə al mani pad gə dusi də sər sər me ur 'wo bərmê mən bəddê.

'Ywa gə mani me, dama gə burgani me

<sup>9</sup> Kal əjəm chen gə burage da, səm 'ywalnam dara Mārî asəm sumi gə 'waga dəm. <sup>10</sup> Me əjəm chen gaba 'ywa mani da, səm 'ywalnam dara Mārî com dodê me ca. Dara

aba 'ywa mani di ha susəgê bam ya chemde ho day de.  
<sup>11</sup> Dara wala gə dawa ana naŋ mwom da, chemde di laa i bam me, ho day susəgə bam me, ladni day cor ilê bêdê. Gun gaba 'ywa mani kaw ha mara bam managə giyê duwa gə ala gaba kanja 'ywa di dalawê yande me ca.

*Mani woni gərsê* nare me woni lamagə me

<sup>12</sup> Gun gaba yêê səw waya məjag managə mani woni gərsêw dwarəgəlê da, dam i sii 'yola gə 'yang dalawê. Dara managə anji dwayna wamani di bam mwom da, ha 'ywa kwəne gə i bêlê gaba dama gə dərêw bəriŋ gə Mārī u bəw way dara ba 'yagə nare woni urêw di. <sup>13</sup> Gun gə mani lamnaw dara asaw acŋa-lê da, kaləw a wayna da: «I Mārī me lamən asən acŋa-lê anju bêdê.» Dara Mārī da, mani nê acŋe laməw asəw acŋa-lê bêdê, me anji kaw lam gun baalna acŋa bêdê me ca. <sup>14</sup> Wala gə mani lamna gun asaw acŋa-lê da i mani nê acŋe cende day nê ilê gun dusəwê bəg di me cwara surəw asnəw acŋa-lê cendi. <sup>15</sup> Targin dŋang da, mani nê acŋe cende day nê ilê gun dusəwê di u gudi me yêê acŋa. ərə managə acŋa di jor naŋ mwom da, hara gə madə me ca. <sup>16</sup> Chamran nê nê urgə naŋ, kalna lama sədəng dī. <sup>17</sup> Mani nê wo pad woni sumi me nê ladə gə dərêgə bəriŋ me da swa i daa Mārī gaba bwa mani woni acŋa mana di səwê. Mārī di i gun gə co səw dŋang bêdê me anji bi səw bam kaləndə diləmê ya dawa ba də al nəm de bêdê me ca. \* <sup>18</sup> Mārī di, gə urê duwa anju gang, anji 'yandə bəlê i gə gwale duwa gə i gwale səw di dara ba də dəbnəng pii managə mani duwa nê anji bwagə pad di dərêgəlê.

\* <sup>1:17</sup> <sup>1.17</sup> Nê jangə nin yande dara gwale gəndəw gə bəg gə bii gə Grek ba da: *Dun duwa cor daa ya dənê* habde day ba də cogədêr gə dawa ta de bêdê.

*Dwaya gə gwale, me 'wow ala gə giyê me ca*

<sup>19</sup> Chamran nê nê urgə nan, 'wacnana gwale gə ta di: Gun gə woy kaw dwaya gə gwale da a dwayna kalang ma me da, swana kalang wayna gwale bêdê, me kal dusəw swana kalang bêdê me ca. <sup>20</sup> Dara gun dusəw swana maña da, neyem ala gə mani nê lade təba managə Mārī dərêwê bêdê. <sup>21</sup> I dara ta də me, mani pad woni lwabə dang gichəni sədəngê me, mani nê acne nê swa dusi də urineyê me da, biynê sədəng bam dwaregəlê. Yinê gwale gənê Mārī duwa gə 'yang gandəw dusərəngê ta di gə asa gə dii dodê dara i gwale gə ta di me neyem bələng anju.

<sup>22</sup> Kalna dwaya gə gwale gənê Mārī duwa gə sumdəng mərə di, unêw alna gandəw giyê, pəgin bêdê da, anê lam i sədəng dan gang pəgin me ca. <sup>23</sup> Dara gun gə dwayna gwale di, me unêw alna gə giyê bêdê da, wun i ya gun gə yêr dərêw managə gudəramê ta de. <sup>24</sup> Managə anji yêr dərêw di gudəramê bam pad, me, əndêr ha mwom da, mana gə ta-lê dog anji saw dərêw nê anji yaragə di nəmgə bam. <sup>25</sup> Dəm da gun gə kanjə bii gə 'woo gə ladə gə dərêw bəriṅ gə kədə gun daa gəndəw ladə me yə səw woy-yê me dam doy gə suməw mərə me nəmêw bam bêdê ərə uw al gə giyê me da, gun gə ta di Mārī ha biyê bəw managə giyê duwa gə ala dəwê.

<sup>26</sup> Gun wayna ba pam i Mārī tarəw me gamna bəw gaba waya gwale bêdê da, anji lam i səw duwa anju gə Aba ciri gang. Pama duwa gə Mārī di 'ywala duwa hiṅe kaw ilê bêdê bəriṅ. <sup>27</sup> Yarna pama gə Mārī gə 'yang gə ladə abrandə gə Mārī dərêwê da, i wagə gə bagondê lê me namde nê wambə lê me managə jiba day-ê me biyê

gə səm bam managə mani nê acne nê səna dödê woni lwabam gichəni səmê dwaregəlê me ca.

## 2

*Piyê* gə nare dərêgə.

<sup>1</sup> Chamran 'yêni nê anê kal dusərêng managə Aba ciri ənda gaba sumi gə 'waga gə Jesu Kris dəwê da, bəmna piyê gə nare dərêgə gə dusi dan də kala mən bêdê.

<sup>2</sup> Dwayna, ya gun mən gaba 'ywa mani hurnay barge gaba sumi səwê me kuləm gə kili duwa wom naṅ dunuwê, dəmney nəm dwarengê dayara dan-ê me gə mən gə burage gə mani duwa ilê bêdê hurnay barge gə acne gə chêbêre səwê, dəmney nəm kərê di me ca da. <sup>3</sup> Mana gə ta də lê da, anê so aləw gaba hura barge gə lade di horəmbê me anê wayəw da: «əjəm da, hare dam dödê managə lade-yê ka», ərə anê wayəw gə burage gaba 'ywa mani bêdê di əjəm da: «Dəbə dəma daa labaa, hare dam dödê managə səna-lê gədəraninê ka.» <sup>4</sup> Anêalna i ya ta de da, anê pii nare dərêgə me anê kədə i nare woni agə kwanang sariya gə ərmê gə acne me ca.

<sup>5</sup> Dwayna, chamran nê nê urgə naṅ: Mārī anjər nare nê burgêdê nê kwandagə yərgə ba i woni 'ywa mani bêdê dara cendi ba kədənê woni 'ywa mani managə dusi day də kala lê me ba 'ywana dwārī dənê Mārī duwa də ba u bəw way ba 'yagə woni urêw di me ca. <sup>6</sup> ərə 'yêni da, anê al nare nê burgêdê woni 'ywa mani bêdê ichiṅ me, woni gəlêng dərêng hara ganang sariya lê da, i woni 'ywa mani di cendi bêdê mo? <sup>7</sup> Nare nê ta di i woni waya sumi gə lade gə Mārī 'yang gandəw di gwale duwa gə acne di cendi bêdê mo?

<sup>8</sup> I sədə, anêalna bii gə 'woo gənê Mārī duwa gə dfoy kwanaw bam pad di bəw gə gə jangəw maktubə lê ba

da: «Mê ha urê jam gun ya sëm dëma de.» Da anê al i mani nê lade 'yang. <sup>9</sup> Dëm da anê ina i woni piyê nare dërêgê da anê al i acna me bii gê 'woo gënê Mārī duwa di bwang gwale dëdêngê dara anê gëñ bëw bam. <sup>10</sup> Dara gun alna bii gê 'woo di pad me cêlangëna gê mën daa da anji cêlangê bii gê 'woo gê gëndëw wor pad di daa me ca. <sup>11</sup> I gun gaba waya ba da: «Mê ha ala acna gê gichëni bêdê ta di», way d'ang ba da: «Mê ërëm ba mê 'yê gun bêdê me mê cor ha 'yaw», me mê ala acna gê gichëni bêdê me, mê 'yana gun da, mê cêlangê bii gê 'woo gê gëndëw wor pad di daa. <sup>12</sup> Gwale dan gê waya me mani dan nê ala me da, kal gëlnê dara banê i nare nê bii gê 'woo gaba kêdê nare daa di sanga ba anang sariya anju. <sup>13</sup> Dara gun gaba yara jaw n'agëni duwa bêdê da, wala gê sariya-lê da Mārī kaw ha alaw sariya dëban yara gê n'agëni duwa bêdê me ca. Yande da aba yara jaw n'agëni duwa kaw lañdê sariya di bêdê bërīñ me ca.

*Dusi dë* kala me, mani nê ala me

<sup>14</sup> Chamran, gun wayna gê bëw mëra, ba i aba kala dusëw me alna mani gëlnê nëm bêdê da, dusi dë kala dë ya ta de di neyem bëlêw mo? <sup>15</sup> Ya chandërang labaa chidërang 'ywana barge gaba hura bêdê me mani day nê wama inalê bêdê wala gê wala me, <sup>16</sup> gun mën d'arangê waygê da: «Damna labiya, me kal sêdêng urënê, me wamna ëbënê», me dëban 'yagê mani nê wama da 'ywala duwa ilê nalê mo? <sup>17</sup> Dusi dë kala kaw i ya ta de me ca, dusi dë kala dë dëban mani dëra nê ala da, ya ba dë mare bam bërīñ.

<sup>18</sup> Ga gun mën wayna da: «ëndi da, nê kal i dusën, me ëjëm da, mê al i mani me da». ërë nê ha cwaw wayaw da: «Gëlën dusëm dë kala dë dëban mani dëra nê ala

di, me əndi kaw nê ha gəlêṃ ni də gə mani dəra nê ala di me ca.»<sup>19</sup> Əjəm da, mê kal dusəm dara Mǎrĩ ba i mən tenene bêdê mo? Ladə. Dundi nê acne kaw ərəm i yande me cendi laṇa algə me sadə dərêwê.<sup>20</sup> Əjəm mê i gun gə 'ocṇ waya gwale bêdê, mê ur dara 'wacna gə ba dara na me dusi də kala də dəban mani dəra nê ala da ba i də madəri di mo?<sup>21</sup> Yər mwagərandə gə Abraham səṇ Mǎrĩ yêrêw ba i gun səw gə təba dara mani duwa nê ala di dara anji doyəw êw wala gə Mǎrĩ wayəw ba kundə nê gorəndəw gə Isak mana gaba bwasa Mǎrĩ-yê aləw gə Mǎrĩ sarga di bêdê mo?<sup>22</sup> Mê yêr ta da dusi duwa də kala di, me mani dəra nê ala di me dayara daa ca me al gə giyê. I dara mani duwa nê ala di, me dusəw də kala di jor gədə mani sədêgə.<sup>23</sup> I yande di me gwale gə maktubə dənê Mǎrĩ wayaw dara daraw pii di yala alal d̄əm, ba da: «Abraham kal dusəw Mǎrĩ dəwê, me gə dusəw də kala də me Mǎrĩ yêrəw ba i gun səw gə lade təba me», mani di yala alal d̄əm. Ta de me Mǎrĩ 'ogəw ba i jaw mache.<sup>24</sup> Anê yala yêr caga ba Mǎrĩ yêr gun ba i gun gaba ala mani nê təba da, i dara mani duwa nê ala, i dara dusəw də kala mərə bêdê.

<sup>25</sup> Rahab də bəg dədə kanja abje dəra kaw i yande me ca. Mǎrĩ yaradə ba i deme sədə də təba dara mani dəra nê ala, wala gə tandi yêê nare nê Israyel nê gə kəjêgə di sədê, me tandi wagəlê dəmê gaba hara lê gə bərmê gə d̄ang.<sup>26</sup> Ya gun səw gə doni gə hwaya duwa ina lê bêdê da mare, yande kaw, dusi də kala də dəban mani dəra nê ala kaw mare me ca.

## 3

*Gama* gə dilesəm

<sup>1</sup> Chamran, kal nare nan̄ dwarangê kədənê woni gəlêgə kwanandə mani dī, dara anê oc̄n̄ nendə woni gəlêgə kwanandə mani da, Mārī ha alandə sariya waya dwoya kwanandə nê d̄ang day bam pad. <sup>2</sup> Pat ənda lê pad də alang mani nê i gə bərmê day bêdê jiga jiga, gun alna mani nê ac̄ne managə gwale duwa gə waya lê bêdê da, an̄ji i gun gə yə səw gasənani gə neyem yêê səw pad le. <sup>3</sup> Də hurbənagə lemde arjam bədêgəlê dara ba alnandə horəmbê da, sədêgə gə doni pad kaw də i gə dwana lê dəwê me ca. <sup>4</sup> Yarnandə bərwa sən̄, an̄ji jorna nan̄e ya man de me ina i gale gə geche me nwagərənaw daa ya man de kaw, i gə habda duwa gə b̄ani yande me gun gaba yêê habda di ha gandəw mana gə dərêw urê. <sup>5</sup> Gun dilesəw kaw i yande me ca. Tandi i mani nê b̄ani yande d̄əm da, tandi ogə sədə ba də neyem ala mani nê gechide nan̄. Ya anê oc̄n̄ nəm de, duwa də b̄ani yande kaw neyem ulê kudəmi gə geche bam d̄əndang. <sup>6</sup> Dilese di kaw wun ya duwa de, i ciri də dama də nê ac̄na duwa də hurêlê doni ənda lê, me gawin̄ doni ənda pad gə ac̄na. I gə ac̄na gə ta di me, tandi meyendəndə bam yaa əndalê bəra wala ənda 'yaṇa duwa-lê. Dwana dəra dədə meyanda nare bam ta di swa i managə duwa dədə budê bam bêdê bəriṇêlê.

<sup>7</sup> Gun gə gəsage da, neyem paga mwagne nê bam pad le me dirbi me mani woni ṇara dodê me, goche nê kuray-yê me ca, mani nê ta di pad da, i gun gə gəsage me, pagəgə an̄ju. <sup>8</sup> Dəm da, gun mən̄ tenene kaw neyem paga dilesəw bêdê, tandi i mani nê meyendə mana bam nê gun neyem yidə dodê bêdê. Tandi 'won i gə sam gaba 'ya gun. <sup>9</sup> I gə dilesandə di me, də bow gə Aba ciri gə i abrandə di jilay me, i gandədə tandi me, də sərgəng gə nare nê Mārī bogə wunəw ya an̄ju de dige dige di

me ca. <sup>10</sup> Bədêng gə mən ta di gang me, anê bow gə Mārī jilay me, bədêng gə mən ta di anê sərgə gə nare me ca, chamran, kal ina yande bêdê. <sup>11</sup> Di mən anê yêr bəla gə cha mən da, nimi duwa 'yol me đañ me ca mo? <sup>12</sup> Chamran, di mən anê yêr dwaga da, neyem ya cwarna mo? Labaa guy neyem ya dwaga mo? Ina yande bêdê da bəla gə nimi duwa đañ da, gə ha udê nimi nê 'yole lê bêdê đəm.

### Dəriṅ naa nê swa daa

<sup>13</sup> Gun mən dwarangê wayna da ba i aba dərêṅ naa me aba 'wacṅa mani me ca da kaləw a gələnê dəriṅ naa duwa di me 'wacṅa duwa di me gə mani nê ala nê lade me gə asa gə dii dodê me ca. <sup>14</sup> Đəm da, dusi də harni me, də wome me, halgəni me ina lê dusərêngê da, kalna 'waga sədêng dara ba anê i nare woni dəriṅ naa bêdê me sabna kulagə đərbənê gwale səw di dodê bêdê me ca. <sup>15</sup> Dəriṅ naa nê ya ta de da, i nê swa Mārī səwê bêdê, i nê dodê səṅa dədê me i dəriṅ naa nê nê gun gə gəsage duwa me i nê nê sidan dəra me ca. <sup>16</sup> Dara managə harni me halgəni me inalê da, mani nê dodê mad mad me nê acṅe nê woy woy kaw ilê me ca. <sup>17</sup> Đəm da gun gaba dəriṅ naa nê swa Mārī-yê da pii pa da i gun gə dusəw wusə me i gun gə hara gə labiya me i gun gə həlale me i gun gaba daya nare daa me i gun gaba ərmê jaw me ca. I gun gə al mani nê lade me i gun gə pii nare dərêgə bêdê me i gun gə lway gwale gə bu me dusəw da i jiga me ca. <sup>18</sup> Nare nê hara gə həlala jwam da, cendi gəsə həlala jwam di managə tulêgəlê cap cap ya gun ba gəsə gə swagê de me dərêgə nê cendi ṅil gə da i mani nê ala nê təba di me ca.

## 4

Yê gə məlan gə mani nê səna dədə ka.

<sup>1</sup> Dama gə gwale me, nasəba me da swa i woy mo? Swa i managə ərmê dan gə acne gə ilê jara ganang dəban bwagə gwayni gə dam lê sədêngê pad ta di. <sup>2</sup> Anê yər mani me dusərêng urgəle me anê 'ywanagə bêdê mwom da, anê ərəm 'ya gə nare. Anê al harni me anê 'yo mani di bêdê mwom da, anê nasəbə gə nare me anê daməw gwale me ca. Mani nê anê urgə me anê 'yogə bêdê ta di, i dara anê urgə i Mārī səwê bêdê. <sup>3</sup> Anê urnê mani me anê 'ywana bêdê da, i dara anê ur i gə ərmê gə acne me mani nê anê urgə ta di anê ur i dara meyandagə bam pəgiŋ managə mani dan nê dərêng urê. <sup>4</sup> 'Yeni nare woni dəbê Mārī tarəwê jang bêdê nê ga! Anê 'ocŋ dara urê gə mani nê səna dədə ka naŋ mərə da, i ala gə marənde gə Mārī bêdê mo? Gun gə urnê mani nê səna dədə ka naŋ mərə da, anji gədə i Mārī aba marənde duwa. <sup>5</sup> Anê ərəm dara gwale gə maktubə wayəw pad ta di i pəgiŋ ɬa: Dundi də Mārī chəndə gandədə sədêndəlê ta di anji al halgəni dərə naŋe dara ba damnalê jang. <sup>6</sup> Ərə, Mārī al ganandə dusi də lade naŋ dŋang doy bam dara maktubə way da: «Woni gwaba jwargagə da, Mārī cogə tarəw me woni asa dədəgə dodê da, anji al gandagə dusi də lade me ca.» <sup>7</sup> Kalna Mārī me ina dole dan anju me dəbənəw sidan wayna da, anji ha wa hara bam hiŋ sədəngê <sup>8</sup> Chədne hane Mārī səwê ib me anji kaw ha chidê sədəngê me ca. 'Yeni woni ala acna da, biynê sədəngə bam acna-lê, me 'yeni nê dusərêng sər sər da, kalna dusərêng wusənê le me ca. <sup>9</sup> Alna ŋagəniyê wamani dan dəwê me nulnê gura me, kalna baya dan di cwarna gədənê gura me sii 'ywala dan di cwarna gədənê

ṅagəni me ca. <sup>10</sup> Hurbəna dədêng dodê Aba ciri dərêwê me anji ha cwara yibêng dədêng di daa səṅ me ca.

*Waya gə chênəm gwale duwa gə acṅe*

<sup>11</sup> Chamran, kalna waya kwanang gwale day gə acṅe ḏi, aba waya jaw gwale duwa gə acṅe me aw sariya de me da, anji way i biy gə 'wo gwale duwa gə acṅe me aw i sariya me caag da, mê anaw biy gə 'wo sariya mwom da, mê i aba laṅaw bêdê ḏəm. <sup>12</sup> I Mārī mən tenene me 'yandə biy gə 'wo di me a sariya anju me. I anju mən tenene me neyem bəlê gun me meyendaw bam me ca. ḏəm da, əjəm da, mê i wi me mê aw jam gun sariya mo?

*Kalna gwaba gə jwargang ḏi*

<sup>13</sup> Caga da, dwayna gwale ni, 'yêni woni waya da: «Laba labaa sanga da, nê ha nin hara ciri də geche də yandeyê nê ha nin dama lê ala aliya mən, nê ha nin ala kenge me nê ha nin 'ywa gursə.» <sup>14</sup> Mani nê ha alang sanga da, anê 'wocnêgə mənang kaw mo me bəlê dan da ha wunê man me mo? 'Yeni da, anê wun ya masəm gə dəmê ḏani hiṅe me ḏam da, nol bam kalang ta de. <sup>15</sup> Gwale gə de anê ha wayaw di i ya ta de: Aba ciri urnê da, də ha damang dərêndə bəra, də ha dama ala mani nê ya ka de me, nê ya ta de me ca. <sup>16</sup> Ərə caga da, anê 'ogə sədêng 'yêni me anê gwobə jwargang me, 'waga gə sii gə ya ta de da, acṅ naṅe. <sup>17</sup> ḏəm da, gun gə 'wacṅana ala gə ladni me alnaw bêdê da, al i acṅa gə geche.

## 5

*Gəsəni gə 'yagə nare woni 'ywa mani.*

<sup>1</sup> Dwayna gwale gə nê wayang 'yeni woni 'ywa mani di, bwana gura me, nulbənê sədêgə me dara wamani gə ḏedangê di. <sup>2</sup> Mani dan nê 'ywa di meyendə bam

me barge dan kaw dægəne law bam me ca. <sup>3</sup> Jendar dan me gursə dan me kaw marəw yigə bam, marəw gə ta di, ha biyê sandərang Mārī dərêwê dara ba anê al mani nê acne, me ha ulê doni dan gə sədêng bam ya duwa de me ca. Dara anê dajəba mani nê 'ywa wala gə so ka ha pii gə ilê 'yana-lê di. <sup>4</sup> Nare woni nilê swagê managə yiga dan-ê kaw, anê 'yogəgə gursə day gə bərmê duwa bêdê. Dwayna nulê day gə cendi nul dara darang di sən, nulê gənê nare woni nilê swagê day di nəm yaa əndara managə Aba ciri gə Mārī gə dwana pad i əsêwê di suməwê. <sup>5</sup> Anê dam dodê sənə lê ka, mana gə ladəbeyê me mani nê dərêng urgə me anê ənbə al swani ya mani nê paga nê gə ha gandagə dara kunbêgə bam de. <sup>6</sup> Nare woni ala mani nê təba da, anê bogə gwale dədêgəlê me anê 'yêgə bam me ca kaw, cendi tiŋ bədêgə way gwale bêdê.

'Wo gə di bam wamani-yê

<sup>7</sup> Chamran, unê dədêng bam bəra Aba ciri cwara duwa lê ba. Yarna aba yiga sən, anji u dəw bam bəra bədə gə sənə duwa də anji yigədə di ba nanaw swagê ladna. Anji ugə swagê di dəw bam bəra bədə gə Mārī gaba 'wa dəriŋ nê pii-yê me gə targəŋê me ca. <sup>8</sup> 'Yeni kaw unê dədêng bam me yinê dusərêng waynale dara cwara gənê Aba ciri duwa da, wor i ib dên dəm.

<sup>9</sup> Kalna nulbê gə kwanang gwale day dfi, chamran, dara sanga kaw kal Mārī anang sariya bêdê me ca. Yarna aba agə nare sariya di yala dəbə lê kulə bəwê ib dəm, anji ha dəmê i kulê. <sup>10</sup> Chamran, kalna dusərêng gunêng managə woni waya Mārī bu nê pii nê way gwale gə suməw di dədêgəlê sən. Cendi 'wo dədêgə bam managə jiba day-ê me 'yeni kaw alna yande me ca. <sup>11</sup> Sii

'ywala di i dara nare nê tanga pii woni 'wo dædêgə bam ya ta de di day. Anê doy mana dænê Job duwa me yêê duwa gə səw managə wamani gə 'yow dalawê me mani nê Aba ciri gə Mārī al gandəw di me ca, bêdê mo. Dara Aba ciri gə Mārī da, i gun gə dusəw ladə nane me dərêw 'yêngəw gun dəwê me ca.

<sup>12</sup> Chamran, pii pa da, kalna sərgə sədêngə daa bêdê me gə səna bêdê me gə mani nê d̄ang bêdê me ca. Gwale dan gə anê wayəw di: ina i «êw» le i êw, ina i «bêdê» le i bêdê me ca, dara kal anê bwarna managə sariya dænê Mārī duwa lê bêdê me ca.

#### *Amsa gə Mārī dara woni mwom*

<sup>13</sup> Gun mən managə d̄wərangê wamani 'ywawe mo? A amsəna Mārī me gə d̄ang dam 'ywalalê mo? A tunê diri bwanaw gə Mārī jilay me ca. <sup>14</sup> Gun mən managə d̄wərangə mwom aləwe mo? A 'wagəna nare woni d̄əbê nare nê nê Mārī nê dayar mana mən dərêgəlê amsə naw Mārī dəwê me kwogədənaw swani dəwê me gə Aba ciri suməw. <sup>15</sup> Amsa gə Mārī gə d̄usi də kala da, ha swa aba mwom di i daa me Aba ciri gə Mārī kaw ha 'yaw labiya me ha kala dusəw həlala managə ac̄na duwa dəwê me ca. <sup>16</sup> Wayna ac̄na dan gəndəw daa, daa, managə d̄wərangê me gun gə woy kaw amsəna Mārī dara jaw me dara kal anê 'ywana labiya. Dara gun gaba ala mani gə bərmê duwa təba da, amsa duwa di dwana duwa ilê nane. <sup>17</sup> Abe gə gə 'ogəw Eli da i gun gə wun ya nendə dē me an̄ji amsa Mārī gə dwana dara Mārī ba 'wana bêdê me Mārī di 'wo bêdê al aliya subu gə durə kubi. <sup>18</sup> Managə ta lê da an̄ji cor amsa Mārī ba 'wana bi, ərə Mārī di 'wo me swagê kaw dəm me naa səna dædê me ca.

<sup>19</sup> Chamran, gun dan mən dwarangê nwalna bərmê gənê gwale səw di bam me jaw gə d̄ang walnaw cwanaw bi da. <sup>20</sup> Kalna dusərêng gunêng gwale gə ta di dəwê, gun gə cwanay aba ala ac̄na gə nol bam di bi managə bərmê gə lade-yê da, an̄ji ha bələw i daa made əsədəlê me Mā̄rī kaw ha kala dusəw həlala managə ac̄na duwa gə nān di dəwê me ca.

Magtubu dənê Mǎĩ

Somrai: Magtubu dənê Mǎĩ (New Testament+)

copyright © 2020 Wycliffe Bible Translators, Inc.

Language: (Somrai)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 12 Feb 2021 from source files dated 12 Feb 2021

709a9ed4-78c1-5393-bf98-819ac0f1bbbc